

三

迷

奇

三述奇卷六

鐵嶺

張德彝在初隨筆
貴 榮竹坪校閱

辛未年六月初九日戊辰細雨陣陣按別國公使駐劄某國其公署及所用僕役本地人皆不能干預僅有在外滋事或賊盜藏匿公署則該處官員不能親往緝捕必先行文于公使聲明其事懇其送出俟覆文至或刻即送出或令其派人往捕然後酌奪施行皆彼此恭敬友誼之意也又各國使臣公署每值彼此喜慶之事皆

挂國旗以伸賀之。若值彼此弔亡之期，則挂旗于桿之半，以示兩存之意。似與挂劍絕絃之意同也。未初一刻，哥士奇來拜坐談極久。中正同俞惕盦隨星使乘車行數里過橋至巴喇的牌松葉巷第又三十號大玻璃局一觀。局名未詳。樓房寬闊，玻璃器皿大小不一。假水晶瓶高有丈餘，周二三圍者，形如至字，或倒書高字，皆通體瑩潔，徹底光明。又有以玻璃造成之假瓷、假石，色如翡翠、瑪瑙，與真逼肖。乍看無有能辨之者。又至第四十六號大瓷器店，所有花瓶、盞、碟、盤、盞、罐、盒，描畫丹青多

仿中土之式。又有以瓷造成之假古銅。其色黃碧。質輕於銅。而聲之淵雅過之。其餘如人物花卉。顏色鮮明。工亦精巧。

初十日巳巳陰申。正隨星使乘車走立伍力街。至宮旁巴當洛亞市。見各屋羅列貨物。尤多于前。如鐘表、鐲簪、槍刀、書畫、衣冠、寶石、瓷鐵、玻璃等。巧奪天工。真假難辨。晚開房後馬逼園。開乃同眾往瞻。其門首貼一帖云。入者男納三方。女納一方。入內一天星斗。萬盞燈光。當中跳舞。亭樂聲大作。清妙可聽。四壁花木。路徑曲彎。真水

假山相映成趣。又迎門石牆畫樹林一叢。中有大路。光影似真。不知者在燈下遠望。漫遞有數十里之遙。當晚妓女結羣。輕盈綽約。宛如仙子臨凡。而執袴子弟之往來追隨者。亦舉國若狂也。入夜晴暖。

十一日庚午晴。午後同俞惕盦街遊。步過凱歌路。轉入芥殿街。見一小鋪出售男女裝飾之物。如襪褲巾帶。手套帽花。面罩領袖等。有白布形如護膝。纏有絨繩四根。長皆二三尺。問之。乃幼女之假乳也。因洋女以乳大腰細為美。然腰可束之使小。乳則不能縱之使大。故幼女

假此以飾其觀。而及笄之女，乃有製就簾具，形如八字者，暗圍腰間，視以為美。

十二日辛未，早晴，已正陰，大雨傾盆。近日街市出售果蔬頗多，如桃杏橘棒、甜瓜、地堪、菠菜、白菜、黃瓜、茄豆，無所不備。惟李有青黃紅三色，味不甚甘。梨色青，外堅而內軟。未正雨止，天晴。酉刻步行十餘里，至立斯本巷第六十四號拜高恩夫婦，其長女次女皆已于歸。其次子卓志現回美國紐約，邦義塾肄業。亥初回寓，知王子顯來拜。按西國兒童不拘男女，凡八歲不送入學者，議罰

有例。故男女無論貧富。無不知書識字。而學堂之制亦善。有男學堂。女學堂。大學堂。小學堂。而各堂衣帽不一。其式如兵勇之號衣。成羣結隊而行。一望即知其為何堂者。

十三日壬申晴。申初。同俞惕齋。隨星使乘車遊柏路。狂園。是日為禮拜之期。一路車馬如雲。將過小湖。而陰雲密布。大雨滂沱。遊人皆興盡而返矣。其男女步行者。因無處暫避。祇得冒雨奔馳。甫入門而雨止。可謂虛此一遊也。

十四日癸酉晴。酉正。隨星使乘車赴凱歌路。行數里。過
埃及石柱。步入其居洛里王宮。後之菊羅籬園。所駐官
兵。昨始撤去。仍留數名荷戈嚴守。每日戌正閉門。觀者
無阻。臨街左右高臺。仍有木房兩行。花木尚未修齊。池
雖有水。不見暢旺。樹多有被鋸而去者。宮之正門。闌以
木板。禁止行人。其東北二面。紅牆獨立。一木無存。其西
南二面。雖未被焚。而窗壁摧殘。金玉皆為瓦礫矣。此宮
建于西歷一千五百六十四年。即明嘉靖四十二年乃為其先王
葛達林米特夏所創。地基不大。建造樸素。至其王漢里

第四踵事增華。頓改舊蹟。迨路宜第十四。復加恢廓。蔚然大觀。迄今三百餘年。極其崇飾。殿深百丈。闊十一丈。高八丈。通身白石。晶瑩耀目。其中層樓複閣。邃室蜂房。盤盤囷囷。矗不知幾千萬戶。陳設華美。古董紛披。宮後即園。臺沼陂池。林木花卉。天然布置。清景宜人。宮前設有總藝院。院名魯瓦。四面有門。崇閣靡麗。與宮並峙。王割宮之四分之一為禁地。守以兵卒。其他四分之三。則許人民遊眺。此弄于同治丁卯年。在彼所聞見也。一旦遭此兵災。比咸陽之一炬。凡物盛衰。各有其遇。至事過

境遷豈不增人歎歎感慨耶。

十五日甲戌晴。聞近日對戶之曲園。因天氣酷熱。聽樂人多。議長座價。一人三方。不料連日陰雨。反減至一方。每夕燈燭輝煌。觀者如堵矣。記西國男女固有聰明愚魯之分。然咸以恥辱為重。終朝街市無有口角鬪毆。以及詈罵情事。倘被人欺侮。控官請理。其毆罵人者。雖情足理順。亦必因逞兇滋事。而受押受罰。又座客談天。不及穢物。苟有叙及糞穢等物者。羣相駭異。或有避席而行。不顧而去者。乃以此人。何至不堪若是。總之。師之于

弟不施夏楚主之於僕不加唾罵男女擁擠不喧譁不出惡言朋友往還更無毆辱詈詬之情事焉又記左鄰比畫閣之大玻璃房高逾五丈深四十八九丈寬一百餘丈

十六日乙亥忽陰忽晴午後哥士奇來約往觀官鈔局即時隨星使同高引之乘車行六七里至班魁巷局頗高大所印之票用銅板鐵架法與印新聞紙同板係先以銅刻陽文再以樹膠貼作陰文後將樹膠懸於電氣水內碎銅自然吸上又成陽文板雖數塊只須一模又

紙內含有陰文板用銅絲者造法未詳一切使用器件咸造于此樓下穿地為庫以儲各國銀塊洋圓樓頂有照畫房以辨鈔之真假男女工人計七百餘名每日出大小銀鈔萬萬申正回寓記西國男女工人每日工作飲食例有限定時刻不得逾時五分鐘違可控告局主受罰

十七日丙子大雨酉初止往拜高恩見其妻女焉有一老媪皮氏者奉耶穌教所言多與佛教同如人生以行善為先男子應娶某女女子應字某人自有天定善人

升入天堂。惡人墮落地獄。行善上天保佑。為惡報應。循還等語。弄言為人行善。乃東彝之良。然善欲人見。不是真善。惡恐人知。便是大惡。眾皆合掌稱快。亥初回寓。入夜微晴。

十八日丁丑。鎮日陰晴不定。見巴蕾洛亞市所售各種寶石頗多。惟金鋼石最貴。所飾之物。有耳墜。項圈。頭箍。戒指。表練。釦。鍼等。更有黃白赤金與銀造之小匣。小盒。工極精巧。鐫釦有質堅體重。而內心空者。有如蛇皮。錦者。鱈魚骨者。長皆盈尺。柔輒細輕。大小隨腕。又種燈表。

形如豐字。下有花石或鍍金銅座。上一暗玻璃圓罩。罩上四圍寫數。臨口一小玻璃筒。如烟筒。罩心然燈。下面平放一表。表下垂墜。亦有無墜者。旁立銅鍼。上絃則鍼不動而燈罩轉。時刻不差。罩內燈係銅盤。油瓢瓷餅。中插燭芯。長四五分。然之。光亮與燭燭同。此表每高一尺。座與罩粗皆八九寸。式如燭臺。每箇價值三十方。合銀三兩九錢。

十九日戊寅晴。早德克碑約俞惕盦至其家。詢及調治。為痧脹及霍亂瘧疾等證之藥。因適求法邦染是病者。

多而能愈者少。亦勤學好問之意也。晚飯後殷柏爾約
四五友人于其屋中齊聲作樂。參差斷續。音調平平。子
初始散。

二十日己卯晴。是日係禮拜之期。因上禮拜日有雨。故
是日街市男女擁擠。車馬紛馳。往來密於螻蟻。午正有
郝第之妻攜其二女來拜。俞惕盦以香茗一壺飲之。皆
言甚甘。近來官署之被焚者。如王宮巴里府暨戶兵部。
皆動工修造。漸復舊觀。凡漆石路之有缺凹處。亦皆修
補平坦。

二十一日庚辰晴。聞近日德人來法。多有被害者。前夜某村有一德人街行。被土人由窗中以手槍打死。次日德人聞之大怒。戕死男女數十以報復之。見鋪中出售巴里城圖。其被焚各處。皆以紅筆點畫。又各處燒毀形式。皆照成小畫。星點無遺。觀者能勿神傷耶。入夜微風。細雨淋漓。

二十二日辛巳晴。申初。隨星使乘車。行十餘里。至夢馬大街。遊左右荷包巷。法名巴薩。日上罩玻璃棚。東西肆。塵櫛比。百貨錯陳。見摺扇七股。飾以蛤蚌。面則白綾。繪

有花朵工不甚細。價值二千五百方。合銀三百二十五兩。拐杖造有魚骨者。鯨角者。飾以珊瑚孔雀石。每根價亦數百方。奇甚。

二十三日壬午。晴暖。申正。隨星使乘車。至柏路旺園之茵圃。列小湖旁。見岸邊有舟無人。下坡回首。有二篙工藏于石洞。登舟問以何往。告去。中心島。篙工入洞。以紅紙書憑票一張。索錢一方半。開舟載六七八人。水深四五尺。湖心二島。中連木橋。左邊者。魚游雀噪。花木叢生。上一小木亭。形比篆書官字。望之點綴清雅。紅紫芬芳。右

邊者亦多花樹。有木樓加非館。登岸少憩。見各間樑柱。以及左右樹榱。皆含有槍礮子。若許大者如蘋果。小者似核桃。樓房尚未修理。窗壁破爛。雜物亂陳。有一貧人。只售凉水紅酒各數瓶。乾饅饅一匣而已。堤邊繫有一人自行舟。係下二鐵柱。作魚腹形。中一明輪。輪上橫一鐵椅。人坐其上。以手轉舵柄。腳輪軸。運動極快。與自行車同。又二人自行舟稍大。舟面中立小鐵桌。前後各一鐵椅。前者端坐。暗持舵柄。後者隨坐。隨搖。椅動舟自行矣。記外國舢板小船。各處不一其製。雖間亦挂帆。然皆

用槩而不用楷酉初回寓

二十四日癸未晴記外國多以女為公平仁愛自法國
無君改民主後凡大小金銀銅錢以及鈔票皆改刻印
女像頭戴二翅立如馬耳又街市各公所皆于樓頂設
立或一或三石女像背有雙翅如飛兩手作指天畫地
狀以示公平之意其王宮後埃及石柱四角之石像係
下一方臺上坐一女形狀不一高皆二丈周各三丈餘
其義乃水陸公私得意平安也未初高恩携其三女來
拜。

二十五日甲申晴暖午後瑞士國公使來拜坐談片時
申初隨星使遊巴蕾洛亞市見綠寶石大如指肚者價
書二千五百方合銀三百二十五兩又列有日本貨如
象牙耳墜鈕扣等內含蒼蠅蚊蠓其銀銅耳墜排扣帽
花簪針等多造有蝴蝶蜘蛛蜻蜓蟋蟀五彩鮮明與真
通肖

二十六日乙酉晴熱午正隨星使乘車答拜英瑞二國
公使皆未遇回公館後哥士奇請看賢日耳曼大街之
電信局樓房高大共有男工五千餘名各國各省之銅

線。以此為總匯之區。所用有原字者。有以點橫代字者。惟一小桌。面似洋琴。齒上鑿字。用時以指按之。往來極快。又一種與四年所看者稍同。亦以銀箔紙寫字。裹于木軸之上。軸長五寸。粗如雞卵。旁另一軸。上捲長白紙。彼軸轉。此軸亦轉。自將銀箔字傳印于白紙。筆畫色綠。清楚無差。另一屋內。四壁懸銅錢數百。係各省者。又一種氣機。大小銅筒如鐘似號。係于城內四面地中。暗通鐵筒。由此聚信。百封填滿小筒。放入大筒。機關動。自有壯氣吹去。每一筒需時二分。中正回寓。微風拂拂。暑氣

頓消無須揮毫

二十七日丙戌晴酉初隨星使乘車出城至柏路旺園
茵湖列湖欲駕小舟以遊水手告以無人弄槳乃有洋
僕周賓福脫衣奮勇弄遂與之把舵湖周約數里二島
橋連形似魚泡環繞曲灣行藻飄浮風清浪靜如在鏡
中遊也遇一舟稍大內坐男女老幼九人繞畢登岸入
加非館吃葛婁賽後步至左島看木亭已被鷺子打壞
一路鶯啼花落氣尚清和戌初回寓入夜陰
二十八日丁亥陰午後大雨聞前于西麻一千八百七

十年七月十六日。即中同治九年六月十八日。德京之
民因德法起釁。即懸燈結彩。鼓樂喧天。至本年正月十
三日。乃西曆三月三日。因德法議和。復懸燈結彩。歡悅
尤甚。所謂喜溢于中。樂溢諸外也。去歲之樂。即修我甲
兵。與子偕行者。無其壯往。今歲之樂。即虛其彝鼎。為君
銘勲者。無其欣悅。德京兩次懸燈。需用浩煩。以致煤氣
不敷。多有懸中土燈籠者。是夕燈燭輝煌。城如不夜。男
女遊觀。絡繹不絕。車馬如雲。笙歌達旦。雖上元亦無其
繁盛也。

二十九日戊子晴。是日為西曆八月十五，即天主母升天之日。又值擊破傘第三之誕辰。往年是日燈火綿互，放花懸彩，鋪戶關閉，人民街遊，以伸慶祝之誠。不意是日並無花爆燈燭之樂，只有多半鋪戶關閉，男女街遊而已。毫不開熱。亥正大雨傾盆，似其天主母怒其八分敬君而二分敬天，又似三月無君，天為之悲也。又見新聞紙云：恐是日拿破傘第三欲帶兵來此復位，與德再戰，以報前讎等語。

七月

初一日巳丑晴午正哥士奇請星使看其地中雜水道，
 乘車行數里至其王宮左立伍力街下車掀鐵蓋而入，
 蓋與地平同步石梯而下其道高約丈五寬二丈水溝
 深九尺寬一丈二尺左右堤各寬四尺其上行人臨溝
 有陽鐵轍上立方車可坐數人前二人執燈引路後四
 人用手推行此道與溝之上下左右皆以石砌甚為堅
 固曲灣環繞通城閭巷皆連家家污水由鐵筒流入達
 于城外思安江口而入海乘車一路水滾聲音頗大地
 面車馬行聲如聞雷鳴于上中有電綫周達各處有工

匠百人修理。是道蓋亦被叛勇拆毀也。當日車至萬洞坊銅柱下，換舟又行數里，繞至馬達蘭禮拜堂旁，棄舟步梯而出，申正回寓。晚有合眾人車謁斯者，約茶偕劉輔臣行十餘里，至吶伍卜的高街大書院入內，見男女四人談次，飲加非與茶少許辭歸。中途至居福巷口，忽一土匪將某人雨傘奪去，因彼此力猛，使傘兩分，某得其柄，西刺烏雲密布，驟雨迷空，亥正止。

初二日庚寅，鎮日陰晴風雨不定，時暖時涼。午初一刻，哥士奇請星使早酌，酉初回。近日街市馬車羅列稍多。

其價始歸舊例。蓋外國繁盛都會之區。大小車輛多至一二萬號。故價有定章。從無爭求增加之事。且御者必識全境路途。熟諳執轡之藝。乃能充當。又各車帶有草料一袋。隨時隨地可喂。喂則套袋繩于馬首。袋口承于馬口。以憑咀嚼。其法極便。

初三日辛卯。陰晴如昨。午正往探虛的。因其患頭痛也。洋人多以中土百合油為頭痛之妙藥。乃贈一瓶。其人甚喜。聞德法交兵之始。法兵一百一十萬。德兵一百一十二萬。法兵無助。德兵有南北日耳曼助之。北日耳曼

出兵八十六萬有奇。南日耳曼亦三十餘萬。德共得兵二百四十餘萬。倍於法。兵法以南日耳曼係其鄰邦。必不助德。今竟得助而勝。法之疎於計算。亦可知矣。初德與南北日耳曼為一國。後成鼎足之勢。今三國復合。而為一。是德不惟勝法。更得南北二國也。其助德之由。蓋圖報四十年前拿破侖第一征討之讐恨也。又德國原名布魯斯。至是改名德義志。更因疆土遼闊。乃改稱其名。王曰開色爾。係德言皇也。

初四日壬辰。陰晴各半。未初。星使赴法。外部與熱夫類

辭行告以定于後日起身往歷英國。西正回寓。入夜大雨。記東西各國船隻計有數種。惟二種鐵殼船。極其堅固。一名牛安賽者。係暗輪。長二三十丈。寬四五丈。高數丈。通身鐵板。厚皆盈尺。其式上窄下寬。旁看如城。前後挂旗。中五烟筒。桅與中華者同。亦無橫杆。烟筒只一粗逾五圓。羅列大礮架以鐵盤。一名莫呢它者。亦係鐵鑄暗輪。長二三十丈。作橢圓形。船身入水。船面幾與水平。上無桅桿。只兩角二旗。中一烟筒。筒前一圓臺。不甚高中。藏大礮兩船。船身及所列礮位。四面運動。隨意咸用。

火機是敵礮雖著不能傷人

初五日癸巳晴暖午後星使令彝持片代謝英國公使
來羊斯因其送有護照薦書也成初街遊見埃及石柱
前放一大千里鏡長約丈二粗逾二尺支以鐵架上有
活軸四面上下轉動如意以之看星每人計費二鮓當
時天不甚黑見西北一星遠不甚亮以千里鏡望之乃
星牙也式大於月光明於月燦燦熒熒金光四射入夜
束裝

初六日甲午晴寅初睡起點心星使令彝與俞惕盦張

雲波等隨往。餘皆留住于此。卯正起身。乘馬車至火車
 客廳。少坐。辰刻登車。即開。穿大小山洞五。皆不甚長。過
 村鎮七。如開蓋村。薩皮葉莊等。亦頗荒涼。未正抵夏雷
 海口。見樓舍稍多於前。而人煙稀少。下車即上輪船。船
 名玉王申。初展輪。風起浪湧。男女嘔吐者過半。是時天
 陰。浪激如雨。酉正抵英國都法海口。下船。見男女老幼
 擁擠數百。少憩。復上火車。即開。一路飛行甚快。經過各
 村。並未停車。穿山洞十一處。長有十餘里至二十里者。
 戌初至倫敦。易乘馬車。行十餘里。仍入前戌辰年所住

之葛羅武那爾店店主司米士夫妻暨其夥計多人相見甚喜可謂他鄉遇故知也入夜陰

初七日乙未陰霧記英國一種朋黨名曰佛來斯大爾譯言林中人也是黨無婦女入者每人每月助錢若干其中有病者公請名醫與之調治入黨三年後老則公養凡遇危險互相救護是日係西曆八月二十二日為其黨首之生辰黨人皆以綠色為號有著綠帶者綠衣者綠帽上插紅雞翎腰橫喇叭如蘇格蘭人裝飾者共人數百乘火車往水晶宮赴會夜半始回結隊歌唱吹

弄喇叭聲音震耳。蓋店樓後即威克兒立雅火輪車客廳也。

初八日丙申仍霧。午正英外部總辦子爵安福益來拜。未初隨星使乘車往拜法國公使適值正使在衙洒民會故署使迎入坐談片時。申初大雨一陣。雨後仍霧。晚餐得食李杏皆大如桃。記外國客寓氣大有窮奢極欲可擬王侯之家者。寓資及飲食每人每日必須三四五六七金不等。其大飯廳亦極華美。食物精緻。伺候周到。即不投寓者亦可往餐。男女雜坐。與其舟同食無異。其

客之不欲在彼飲食者即可相用本層樓之客廳飯廳
寓資既費而僕婢亦須多用焉

初九日丁酉陰霧早有前駐上海英國領事官麥華陀
來拜未正法署使來回拜少坐即去申初隨星使乘車
行十數里赴外部答拜安福益入內周遊樓宇建以五
彩花石高峻宏壯又答拜麥領事未遇申正一刻上火
車往水晶宮看烟火樓內花木葱蘢修理潔淨上下種
種貨攤更多於前中所去者惟大樹槌與生鳥因其左
鄙于前歲失火而今重加修理添有男女中廁洗手屋

等處更于左右加列飲食加非館數處後步石梯數級見橫匾上畫一魚又似二魚各長二尺共長四尺乃此魚之頭入彼魚之口連而成一也眾以為奇即步石梯下樓另至一門臨入各給什令一枚左右列有十餘玻璃箱式與法京牲靈園同亦皆高大淨潔魚身畢見惟所存魚鱗無一新奇者其所畫之奇魚乃引人之餌也看後步入角樓晚餐用飯者亦須買票每人二什令半合銀三錢五分桌處羅列齊整四壁玻璃光明食畢開窗看烟大是日男女老幼萬餘人少者教于達老者休

于樹成刺大雨一陣人皆擁擠躲避。初開放花爆子
初止所放多與前同。惟在宮樓中與當院鐵架頂橫一
鐵繩長數丈。花爆將完一人由樓前跑去。然中心之起
花先轉後起。輪如皓月。看畢下樓。火車已開。候至子正
一刻。別路車來搶入。丑初抵倫敦晴。

初十日戊戌晴。午後法署使請看新設萬商會。即同俞
惕盦隨星使乘馬車行十餘里。至夏斯街。入內地極寬
闊。式作員字形。四面木建高樓。環繞層臺。間有花園。芬
芳襲人。先一圓樓高十數丈。頂似僧冠。四面有門。中設

英君主御座樓上南面一大風琴。如合眾國包斯頓者。出南門四面木樓皆二三層高亦八九丈。各層羅列各國新奇貨物。如五行器皿玩物輪機電氣格物種種筆難盡述。中懸大小油畫四千餘張。各皆註明何國人所畫何物何處景致。價值若干。其他各物亦皆挂有牌票。上印鋪號價值。繞遍入園。少坐辭回。記西國繪畫之事。競尚講求。然重油工不尚水墨。寫物寫人務以極工為貴。其價竟有一幅值萬金者。畫人若隻身之男女。雖赤身裸體。官不之禁。謂足資考究故也。故石人鐵人銅人。

各像亦有裸形卧立蹲伏者。男女並重此藝。婦女欲畫赤身之人。則囊筆往募。詳睇拈毫。以期畢肖。至男子描摹婦女之際。輒招一纖腰褻體之妓。令其褫衣橫陳對之著筆。亦期以無微不肖也。

十一日巳亥晴未正。萬牲園主請遊。彘隨星使乘車前往。其中禽獸魚蟲羅列如初。惟新增一二種。有一猴名教藍教坦者。出于蘇門答臘。高約五尺。色紫面黃。兩爪過膝。性極靈巧。行動如人。又一水鳥名婁麻者。生近北極。身大如鵝。掌亦如之。通身黑質白點。大嘴長項。其聲

如鴨。駸短行動笨滯。又一鳥名美克者。不知出于何國。形如廣雞。短駸色灰黃。爪朱冠。專喜食鼠。酉初回寓。入夜陰霧。

十二日庚子晴。是日係禮拜之期。街市遊人甚多。午後同俞惕盦步行至柴草市。遇有前經志縣兩星使給塔木菴及桂冬卿所延之俄文教習郭福滿立談片時而去。後由荔榛街回寓。知有英文教習艾德林來拜。又聞其街市各酒肆加非館。每于禮拜之期皆應自早閉門。酉初開。在酉初前來者。非有憑票不許入。蓋云為其禮

拜之時也。酉正乘車答拜。艾德林未遇。又亥初殷柏爾辭回巴里。

十三日辛丑晴。早起淑裝。已初由店起身。乘馬車行十餘里。至柴令克洛斯火車客棧。登車已正開。西行二百一十五里。中正抵立溫浦海口。改乘馬車。行二里。仍住前戌辰年所住之華盛頓店。一路麥舍秀色。柳罩濃陰。炎風熾日。汗溼征衣。

十四日壬寅晴暖。申初由店起身。乘馬車行三四里。至瑪頭。駕火輪舟行半里。登英國柏的莫城明輪船。長二

十餘丈寬三丈五尺馬力九百同船男女共四百餘名
戌初展輪出口水平船穩當晚四面陰霧見日月無光
如赤色圓餅

十五日癸丑陰水色黑而甚平西行少北見右面矮山
綿亙間有海燈乃愛爾蘭之東南境也中遇大輪風蓬
若許未刻稍晴申初至愛爾蘭正南坤如城口外住船
上下客人與貨物畢酉初復開西行甚平戌正又陰細
雨一陣

十六日甲辰陰晴各半西行稍北逆風船甚簸揚見二

等客人中老幼婦女赤足披髮卧于船面者數逾三百而上下嘔吐哭泣者大半美國地廣人稀須農開墾雖他種工役人亦多不敷用故英國愛爾蘭貧民之攜妻帶子前往耕種傭工者每年以數千計迨五年後其願入籍者聽

十七日乙巳仍陰晴不定船蕩如昨水色深綠早餐共桌祇男客二三而已女皆嘔吐仰卧終朝入夜細雨陣陣涼記西國婦女之年逾二旬者出門遠行皆可隻身搭船乘車既無僕婢跟隨父母亦不攔阻聞英德丹和

義瑞等國如是者尤多。

十八日丙午陰船仍簸揚冰色深藍未初晴遇風蓬一隻頗大乃東行者夜改順風稍平記外國一種玩物名曰布洛克斯者係仿中國七巧圖所造共木四十四塊第一塊長八寸寬四寸厚五分第二塊長八寸寬二寸厚亦五分第三長四寸寬三寸厚作扁三角左右各寬寸五第四四寸見方厚亦五分第五係第一之一角第六二寸見方第七厚五分以上寬二寸下寬四寸左右亦四寸第八作銳角形下寬二寸左右各四寸第九三角

形。海邊二寸。第十鈍角形。下寬四寸。左右各三寸。第十
一亦鈍角形。下寬六寸。左右各四寸。厚各五分。第十二
四寸見方。厚由一分至五分。第十三係第十二之半。第
十四四寸見方。中一斜弦凸起。長約六寸。第十五四寸
見方。上半左角二寸見方。凸起二寸。中一斜綫。長二寸
五分。作左右各一缺角。長方。第十六與第十四同。則二
寸見方。斜綫不足三寸。第十七四寸見方。當中凸起四
面。各一鈍角。高二寸七分。第十八為第十七之半。第十
九四寸見方。正中凸起二寸見方。第二十二寸見方。式

與第十七同第二十一二寸見方。式與第十九同。第二十二作鈍角形。下寬四寸。左右各三寸。尖厚五分。下至一分。第二十三長斜方。上寬一寸。下二寸。左長四寸。右長四寸五分。第二十四銳角。下寬二寸。左右各四寸。第二十五作直角。勾二寸。股四寸二分。弦五寸。第二十六等于第二十五稍小。第二十七等于第二十六。下寬二寸。左右各高八寸。下厚五分。頂至一分。第二十八式同第二十三。上寬二寸。下四寸。左右各十六寸。厚五分。第二十九長方。上下四寸。左右各八寸。第三十長方。為第

二十九之半第三十一長八寸寬一寸第三十二與第
四同第三十三等于第五第三十四等于第五之半第
三十五等于第六第三十六等于第六之半第三十七
一寸見方以上厚皆五分第三十八下半一寸見方上
一三角各邊一寸第三十九長八寸寬一寸頂作三角
亦每邊各一寸第四十作三角形每邊二寸第四十一
鈍角上四寸左右各三寸第四十二鈍角下六寸左右
各四寸以上厚各五分第四十三寬一寸長四寸厚五
分兩頭稍切旁看作二小直角第四十四等于第四十

三加倭西人亦以之擺成桌椅牀凳房屋欄杆橋船車馬盆桶魚禽等物。

十九日丁未陰西風大浪船復搖蕩未正晴風改稍北記天下萬國旗幟種種前所述者皆係四海頻見久興華通者其餘五大洲中小國尤多其名雖罕見聞今既遇諸耳目亦應記載以便他人之航海者如阿斐里加之居呢國者長方正紅水師者中一白橢圓內含一紅月身與一八角星南阿美利加之三兜民勾國者長方大白十字四空二藍二紅商旗亦然水師者十字中心

加一圓花。係四柳枝連二礮車。左右四旗。中一洋經。經
上一小白十字。經後分列槍刀四件。水師提督者亦然。
惟後半改成魚尾。平素航海者。三尖長條。前半式與國
旗同。亦無圓花。後則先紅後藍。巴西國者。正綠長方。中
一斜方黃色。內畫二綠枝。捆以紅綢條。枝中另一綠方。
方中一藍圓。周列二十小白星。周中一地球。圍以紅十
字。圍以金條。綠方上一王帽。紅地金花。水師者。正藍。中
以二十白花排成十字。提督者。銳角正藍。十六白花列
成十字。加餘四白花于十字之四空。帕臘瓜國者。長方

分紅白藍三橫白橫臨桿畫一圓圈圍以綠葉圈內周
書帕臘瓜公合五字內又橫書平安公義四字下一黃
獅腰鑒長棍頂五黑錘商旗亦然水師者圓圈畫于正
中二枝綠葉移入圈內以紅條捆成十字上一紅花無
獅錘亦無平安公義四字提督者平方色同後改魚尾
中無圓圈改一黃月牙危的麻喇國者長方七橫分四
色二紅二藍二白一黃商旗亦然航海常用者長條後
作魚尾色亦如水師者中畫二綠枝捆四旗作四字
形中一人頭形金星星下一平方上半鑒十三行六金

七藍下半白地三山當中者上出烈焰薩拉瓦多爾國
者長方九橫四白五藍臨桿上角另一紅平方水師者
于紅平方中立一長方上平下圓如倒書篆文官字其
中上半藍天橫列九白星作橢圓下半綠水中一火山
長方上又一紅王帽作斜書盡字形衛乃久喇國者長
方中藍上黃下紅中心圓列七白星商旗亦然水師者
近桿上角畫二綠枝捆以紅條枝中一方下半藍地白
馬一匹作馳驅狀上半左黃右紅二人一駿方上一捆
青穀圓以黃布航海平行者長條魚尾中藍左紅右黃

牌魯瓦國者長方三段中白左右紅商旗亦然水師者
 中畫二綠枝捆以紅條上架一金邊方方中上半左白
 右藍綠樹黃馬下半大紅金鉢一袋方上另一綠葉扁
 圓圈博歐立瓦國者長方中紅上黃下綠正中一綠葉
 圓圈圈中下邊藍地橫列六白星中一紫山左列房樹
 右懸金日餘皆白色比天頂上橫列博歐立瓦公舍六
 綠字作半圓徑入南海之搜賽伊的小島者長方三橫
 中白上下紅臨桿上角另一橫方豎分三色中白左紅
 右藍三堆池小國者長方八橫三色二藍三白三紅臨

桿上角另一平方藍上畫橫斜二紅十字。

二十日戊申陰晴不定風雨甚大浪打入艙使船亂抖申正遇一火輪名曰俄羅斯乃東行者入夜旁風甚勁船更簸揚。

二十一日己酉陰船蕩如昨已初晴稍平入夜冷記西俗房中布巾每日更新換舊可謂潔矣然用時不令上下拭面揩身並及下體皆此一巾船中亦然又饋面澡身皆以涼水解渴亦以涼水故華人在洋船飲用滾水熱水皆不易也。

二十二日庚戌陰霧未初大雨一陣海水迷漫聞英國
 于二十年前因國費不足設法重收房稅蓋外國樓房
 無牆窗皆外向乃定例每家除窗之不開者免稅餘皆
 每月按數納錢故儉省之人高樓數層祇開一二窗多
 者四五窗而已後因人民不服皆言住似山洞監牢乃
 改令凡樓舍之修竣者納稅竟有高樓百層廣廈千間
 只留一椽永不畢工是雖住萬年而絲毫不納也由是
 觀之公而不公矣

二十三日辛亥大霧寅正船因機器有損暫停修理人

皆驚起彼此互問有言船底觸碎者有言已沉八九尺者女子有恐懼而哭泣者卯正復開稍平午後遇二火輪皆順風東行者

二十四日壬子陰涼西行少南值東風西吹船行頗快已初一刻晴變北風船復搖蕩同行男女之卧而不起者大半

二十五日癸丑晴暖水平船快已正連遇風蓬二火輪三皆西行者午後男女坐談船面見玩物二種一係木墩上立木棍長約八寸放于六七步外人以麻圈大拱

把者擲之套于棍上者勝一係地畫數目三行乃六七
二五九一八三四惟中行頂上另一小方寫加十二字
下一小方寫減十二字玩者立于十二步外以木鏟長
五尺者推木餅餅大拱把其落數多者勝惟到上十字
者加十到下十字者減十數人同玩所得之數陸續加
減中有數逾五十者止

二十六日申寅晴平微風習習水色深藍是日係禮拜
之期上下等客于巳初齊入飯廳列坐船主羅海免冠
立于正中講經講畢彼此齊聲朗誦數次午止散每值

禮拜之期。船主先貼一告白于大艙門。云今日禮拜定
于某時。在飯廳內誦經。屆時鳴鐘聚眾。不願入者聽。當
日同船男女。有名馬爾士蒲魯斯。妻如吳貞者。數人求
以華筆書其名刺。醫生名勞智爾者。向募討錢。言以濟
孤子。已正引水船來。午後見二噴水大魚。遙望不甚了
了。小鳥結隊逐船而飛。申正。因機器有損。少停二次。蓋
此船往來大西洋。已十數年也。

二十七日乙卯晴。寅初進美國東北界。紐約海口。行數
里。住船。其有往牛哲希村者。皆登岸。辰初復開。行六七

里停輪有稅關杆子與各人執照一張令自書某人
乘何船由何處來此所帶行李若干貨物若干旋有小
輪舟接眾登岸臨岸大房行裝運入稅局驗過開鐵柵
則男女攜筐負笈齊出是日其來三船有數千人擁擠
甚亂出門有土人代雇車輛每人二圓半合銀一兩七
錢令其入店以付伊云無暇祇得每人以十三英什令
代給合銀一兩八錢二分行六七里過有年坊入十七
條胡同仍住前戊辰年所住之衛四德敏斯達店店內
主僕見皆甚喜申正有法邦署公使柏爾得米來拜坐

談良久。戊初有店後十六條胡同布拉克來拜。乃紐約
邦之舊相識也。坐談甚得。並請入其家見其妻與二子。
一女。僉云三載未晤。渴想殊深等語。伊夫妻鬚髮皆白。
其子女亦皆成立。亥正辭回。

二十八日丙辰晴。午正星使令執名刺往拜紐約城總
都朗阿。來車南行十六七里。走寬街至皮爾巷。入其官
署。適值公出。未遇。往來街市。鬧熱繁華。尤倍於前。未正。
隨星使乘車至八條胡同大通店內。答拜。法公使回店
晚餐。得食葷菜。粗如鴿卵。甚甘。

二十九日丁巳早大雨已正止午後見有匠人會由樓下經過原各種匠人每日作十點鐘之工今眾約改作八點鐘之工蒙官允準定于是日聚眾慶賀共過一萬六千作樂舉旗有乘馬者如將餘皆似兵列隊而行各著新衣腰橫白布一幅又有馬克蘭司模納暨羅智爾之猶子羅卓志等陸續來拜皆前于戊辰年在包斯頓及那夏拉二處會過者晚有同寓姓費名士者邀飲共酌三鞭一瓶入夜晴

三十日戊午晴申初隨星使乘車行十八九里遊正中

園一路花木如前。路達平坦。水秀山青。往來車輛絡繹。遊人甚多。湖心有舟。遊行里許。萍浮水面。鳥語林中。蜻蜓戲水。花氣侵人。回時見一聚水池。通身石砌。深約五丈。周五十洋畝。戊初回寓。是日頗涼。而土人喫冰者。仍復不少。晚有哈米坦及法穆哈等來拜。亦皆舊識也。坐談良久而去。入夜陰。

八月

初一日己未。細雨午正。乘車往拜稅務司莫爾斐。未遇。見各小巷。亦多木道。木塊長方似甃。左右石路。順種椿。

樹兩行相距各丈許。樹下有池。上軍圓鐵蓋。周丈餘。紋似菊花。又如雀籠。有一樹如桐子。如豇豆。花亞芙蓉。夏開秋實。入夜晴。

初二日庚申晴。見寬街一雜貨鋪。敞廳寬闊無樓。左右兩行長几。分列貨物數十種。如手中表練。杯瓶書筆等。價皆洋銀一圓。隨人揀選。晚有廣東人投刺。自署唐人湯亞金來拜。年約二旬。能英語。因隨福建醫生林連湖來此。為通使。緣林不解洋話也。記是時美國金銀不多。各邦仍用紙鈔。

初三日辛酉晴暖。是日係禮拜之期。鋪戶關閉。男女街遊。自晨至夕。往來接踵。午後有羅智爾與蒲公使安臣之妻弟李文模來拜談。次知蒲公使之長子蒲凌甘已娶妻。留住于此。其次子蒲良蓋亦在此地新聞紙局中執事。其妻李氏原住堪布立址。現因遊歷名勝來此而僑寓也。入夜微風涼。

初四日壬戌晴申初。隨星使乘車先入正中國盤桓十二三里。轉入程魯木園。復繞行十餘里。至高橋旁之小加非館少坐。戌正回寓。一路山水清幽。風涼氣爽。黃花

冷落紅葉颼颼見本地海車不大四輪獨檐以二馬馭之可容八九人御者坐于棚頂車中欲給錢者上橫一繩拽則鈴響御者自由孔中接去入夜陰雲密布西風欲雨

初五日癸亥陰午後乘車往華盛頓坊第十一號答拜哈米坦又至東三十八條胡同第一百二十二號拜蒲李氏見其子女茶罷辭歸西初高引之黃道從慶雲堂王竹軒暨那威勇等由法京來此談及巴里居停主人始知十日前辭房時東婦以面鏡速有蠅屎地氈糊有泥

水爐被烟薰古董蒙塵刀匙灰暗燭盤油膩皆須雇人
刷洗令賠法方二千合銀二百六十兩爭執再四許以
三百方始允合銀三十九兩

初六日甲子早陰午後晴未初有法國柏公使來拜再
三強請星使仍回巴里待星使允乃去酉初一刻有南
阿美里加阿真坦國公使夏希阿來拜入夜復陰記美
國新聞紙多種分售于街頭巷口或持于手中沿街叫
賣至于客寓飯店加非館中皆設有專看新聞紙之房
內列長几每紙束以木棍堆積橫陳任人坐閱見是日

賀拉新聞紙內一則云某巷第六十八號所住之人名費里樸者昨夜墜樓身死蓋洋人窮極無以為生或因他故亦有自尋短見者惟其死法駭人聽聞或登百尺高樓之上自投以求速斃或卧于火車鐵道之上甘心斃于輪下粉身碎骨情形慘然

初七日乙丑陰晴各半涼申正星使令高引之黃道從王竹軒率僕五名起身回國由紐約乘火車至金山是時路初修成長一萬零二百里連行六日晝夜不停所經各處多為紅皮野人所屬而景致新奇樹林稠密並

無客廳。眠食之處。所有廳堂臥室。中厠廚房。牀榻桌椅。盥盤器皿。車中備載。每日五餐。五味俱全。規矩與火輪船同。

初八日丙寅晴。午正。隨星使乘車。答拜法阿二國公使。西正同布拉克夫婦子女。乘車行十餘里。至六十四條胡同。桌口外大街。看集工局。木樓宏敞。燈燭輝煌。男女擁擠。四壁喧譁。其上下新奇貨物。羅列萬萬。無非電氣輪機。五行器具。戊初。同至其家。茗茶少敘。謝別。回寓。入夜束裝。

初九日丁卯晴暖早布拉克父子前來送行已正由店
起身乘車行十八里過王子巷至碼頭登法國賢羅朗
暗輪船長三十七丈寬四丈馬力一千午正一刻開行
跳板將擲回尺許忽二人來奔呼欲上船水手欲將跳
板移回船主赫曰來晚乃止二人無法緩步走回出口
旁風甚快

初十日戊辰晴涼東行少北風平浪靜記泰西各國小
兒多以白鼠為玩者養以鐵籠造以銅鐵絲高約二尺
周三尺上圓下平小屋間間放有食水臨門懸一銅絲

園式比車輪。白鼠走上。隨跑隨轉。似與中華者同。喂以牛乳。泡麪包。或大麥黃豆。收拾潔淨。園園之人亦多養此以自娛。

十一日己巳。晴暖。水藍色。午後天陰。風起。忽旁忽逆。又冷於昨。波浪洶湧。船身搖蕩。人之嘔吐者過半。未刻大霧。中止。晴入夜復陰。見大魚三隊。長皆七八尺者。浮沉海面。

十二日庚午。陰冷。逆風無浪。船尚平穩。記洋人相面。以頭紋幾層。斷其年歲。右手為父。左手為母。紋密者貴。紋

稀者賤。又講人之心思。七情六欲。不主心而主腦。由項
後至二眼珠。分三十五處。如一主戀愛。二主喜子。三主
專一。又主立意。四主因循。五主喜戰。六主損人。又主嘗
味。七主私情。八主允許。九主造作。十主自愛。十一主喜
悅。十二主謹慎。十三主仁義。十四主溫恭。十五主誠實。
十六主良善。十七主希望。十八主奇異。十九主慮思。又
主浮動。二十主聰敏。二十一主學效。二十二主孤獨。二
十三主方法。二十四主體度。二十五主分量。二十六主
梁法。二十七主所在。二十八主數目。二十九主次序。三

十主事體三十一主時候三十二主腔調三十三在二
眼珠主文理三十四主比較三十五主辦理以上各數
皆雙上下左右相排兩邊前不過耳大各有經絡通于
腦髓

十三日辛未陰涼逆風船微簸揚早遇風蓬一隻係西
去者午後見大魚躍水尾露于外四五尺申初甚熱過
南北黑綠水交接處分綫甚齊本船醫生與本船僕役
治病亦索馬金烏

十四日壬申晴順風船快入夜陰記外國二種捕鳥法

一以三塊長甌列成門字。中斜立一塊。支以木棍。棍旁橫放木了。置穀包與穀于斜甌上下。雀踏木了。斜甌自蓋于門上。而雀不能出矣。一以篩羅支以木棍。下放穀豆。棍下繫一長繩。人則拽繩遠立。雀落篩下啄穀。即抽繩而棍倒。其節自覆矣。

十五日癸酉。陰涼。旁順風頗大。船能于一點鐘之時。行四十五里。近日船上食物頗佳。果蔬俱全。梨橘甚好。又有油糕。形如月餅。造以牛奶地。甚味亦甘美。申正細雨。一陣。入夜晴。

十六日甲戌早晴順風船平水色淺藍午後陰水色變黑仍東行少南晚遇風篷三隻皆西行者記外邦一種小舟名曰堪努刺以整木寬約二尺長與他舟同一人坐于當中雙手舉槳槳長七八尺兩首作二長鏟以之左右搖弄極快又外邦救生船內坐九人左右共八槳齊行用力急比火輪

十七日乙亥陰冷順風風號水湧浪激艙面而船搖蕩爰記外國骰子亦以骨造數亦由一至六玩者只用二枚擲以木盒亦數多者勝又種玩物名曰巴塔多爾者

係一長柄木圈內織絲網圈周與柄長各尺半以之擊拱把鵝翎翎長五寸十數根束于一處下半包以皮布二人相距數武彼此對擊多中者勝

十八日丙子陰冷順風巳初大雨酉正稍晴晚餐食有梨糕餅係造以糖蜜與核桃杏仁等作大盤形內盛熟蘋果與梨亦有葡萄地棧等成初忽由烟筒中出火高六七尺乃因木灰積厚故也火星點點亂飛入海如花爆然

十九日丁丑晴暖順風船快水色葱綠平靜無紋早退

風蓬二三年初。一利振法國西北界。布來斯海口先見其渭斯島。長十五六里。不甚高。林木亦少。上立燈樓。百里可望。至此佳船。樓房點綴。船隻不多。礮船五隻。內置大小銅礮一百八十門。後有輪舟來接。下船者男女二十餘人。未初有德威理亞。殷柏爾由巴里來迎。申初開船出口。北行。見左方山皆不高。稍轉東南。長山一帶。嵯峨撐空。入夜風起浪湧。船即簸揚。由紐約又名新埠至布來斯。計水程九千里。有奇。

二十日戊寅。細雨。早東南行。迎面連山綿亘。漁舟若許。

順風無波。水色葱綠。已初至法之正北界。哈五海口外。
住船待潮。見左右山岡寬敞。船在處如攔江沙。前年初
潮長。進口東行。南北礮臺不甚雄壯。而固。後入鐵閘門。
左右石牆。路不甚寬。長約半里。過此入池。寬似津河。船
轉二灣。停泊下錨。口內如此水池者。大小共七處。皆分
類住船。如兵信。商客等。鐵閘係為留潮而設。潮長開閘。
以留水于池內。當下錨時。值午正一刻。行李下後。未正
登岸。乘車行三里許。過木橋三。至芭萊街羅羅店宿。樓
高四層。不甚寬宏。而潔淨。其地間巷曲彎。崎嶇沉滯。城

周二十四里。居民八萬。由布來斯至哈五計。水程八百一十九里。

二十一日己卯陰。早隨星使乘車。行不及一里。入一小花園。名阿卦立雅園。不大而花木叢雜。步步幽雅。池中有一水犬。長約二尺。形似海龍。其色灰。前後短足。如分水。見人即出而覓食。毫不畏懼。又一小山。亂石層疊。巧比天工。山腹空而穿洞。四壁列玻璃箱。其中水色白黃。分為河海。所養之魚。奇形怪狀。共三十餘種。其識者如鱸。木白鱈。鱖。花比目。海鷄。烏賊。牡蠣。鰵魚。大海蝦。藥海。

馬、白魚、蒼魚、鰻魚、鰱魚、金魚、大盈尺而三尾者少，其不
識者有形似蝙蝠者，大片如盤者，圓如饅首者，粉瓣千
重似菊花者，名皆未詳。去此復行八九里，繞至山頂，有
白塔形如中土墳墓，高逾二丈，周約三丈，上抹白灰，下
立石座。土人云：係某水師提督子，數十年前沉于此海。
其妻建此以銘其功。入一小禮拜堂，內供天主母像，懷
抱耶穌。左右懸挂油畫小船若許，皆係水手所獻者。當
時有老幼婦女十餘，皆跪而默誦，率立山頂左望大海。
右看通城，漁舟蕩漾，炊烟上升，花飛葉落，陣陣涼風，大

有中秋景象。入行十餘里。山路崎嶇。盤桓而下。回店早
餐。午初起身。乘馬車行六七里。至火車站。少坐登車。
午正開東。北行六百八十四里。停車四次。過大小山洞
十三。長河四。惟第三河有鐵橋。長約里許。經德兵毀壞。
尚未修補。告成。酉初抵巴里。下火車。乘馬車行三四里。
至馬達蘭大街旁。瑞丹巷第八號。多庫店宿。樓高六層。
屋宇潔淨。梯路曲彎。修飾樸素。入夜晴。

二十二日庚辰晴涼。記天下各國孝服之顏色不同。如
土耳其。其父立亞夏。巴兒西亞。暨阿喇美。呢亞。四國所服。

者皆蔚藍色。埃及國係黃色。或凋樹葉色。艾美歐皮亞者灰色。至歐美二洲各國皆黑色。惟古時法郎西各王后為其夫死皆著白色。名之曰潔。至孛波侖第一之死喪服始改為黑。義大利國古時男著紫色。女著白色。今亦皆改黑色。按以上各色其實皆有所指。如白色之意乃潔也。淨也。蔚藍色乃天也。吾人死後願去之處也。黃色或凋樹葉色。謂死為人生一世之末。以比樹葉之凋殘也。灰色指土。為故人所歸宿之地。黑色指人生性命之休。雨暗雲昏之意也。各國人死皆不哭號。惟瞑目流

涕作悲啼狀。惟斯拉美亞國不惟不舉哀。反以嬉笑之言而慶賞之。謂人死乃脫災難之苦地。而入無極之樂境也。入夜陰冷。

二十三日辛巳。陰。巳正。隨星使乘車行七八里。至阿秀胡同第二十二號。前任法國駐華參贊官孟貝樂之別墅看房。樓高三層。寬闊淨潔。前有花園。為厩屋宇頗多。右鄰臨街。正對敵院。若值夏令。居住可以延爽披襟。而冬季則四壁來風。恐不甚煖。遂辭歸。

二十四日壬午。陰雨。戌初。隨星使乘車行三四里。過王

宮至義達廉大街。入格朗戲園觀劇。是園極大。上下可
 容一千六七百人。所演者一人年近六旬。意欲還童。乃
 登山採藥。正在松下尋覓。聞忽來一鬼。身著紅衣。遠看
 如火。判鬼知其意。乃使其鬚落黃。面狀神足。變一風流
 少年。其人大喜。且言久有一女。愛而不得。鬼遂領去。見
 女。女不允。乃故遺一篋于園內。有金剛石鐲釧耳墜等。
 女見以為天賜。喜而佩之。方去照鏡。見是男立于其後。
 二人始和。女父知而大怒。携其長子出街尋獲。遇之于
 途。則對鬪。而男有鬼助。乃刺死女父。女由是乃瘋。尋亦

故去女卒升天。男鬼皆經陰神投入地獄。是齣共男女
二百餘。花樹樓房。跳舞歌唱。與他戲同。惟高山皓月。長
江石橋。舟車鳥獸。花影天光。及舊石柱。粗二三圍。高二
三丈者。以雙眼千里鏡望之。真假難辨。更有彩雲。踈星。
荷風。槐日。仙女數十。飛騰半空。其中固有真人紙畫。然
久看之。假水起波。紙人亦動。妙甚。子初回寓。

二十五日癸未。晴。午後同俞惕盦往訪王芝友。坐談許
久。在店晚餐。得食螺螄蛤蜊。味亦頗鮮。又見菜市賣有
倭瓜。大如鐘磬。枸橈重一斤四五兩者。價值一方半。合

銀一錢九分。

二十六日甲申晴。見本地有汗衫褲襪、手套披肩、以及護膝等，皆織以絨綿，溫柔活軟，能小能大，價亦不昂。又有小鋪賤賣信紙、名片等，信紙與皮，皆印有五彩變體洋字，任人挑選，蓋字皆名姓之首一筆也。名片大小不一，有白色者，有鋪粉者，作成雲彩，光暗分明。婦女名片有染桃杏花色者，字多任意用楷書或草書，亦有將字變成花朵者。平素名片可以擇字現印，每百二方，合銀二錢六分。

卷六終